

JUAN jóasugueripũ

Jesucristo catiré petihére ticogú

1-2 YHH múârê Jesucristoye maquêrê, cũũ niirecutirere jóagu tiia. Biiro niiã: Cũũ atibúreco tiiádari suguero, cũũ Pacumena niitoarigu niiwĩ. Too síro atibúrecore bauárigu niiwĩ. Cũũ Cõãmacũ wãcũrêre wedegú niĩ; teero biiri marĩrê catiré petihére ticogú niĩ. Ësã cũũrê ññawũ; cũũ wedeseri tuowũ; cũũrê padeñáwũ. Ësã basirora cũũrê ññawũ; cũũrê aññurõ masíwũ. Teero tiirá, ùsã cũũrê ññariguere múârê wedea.

3 Ësã marĩ Pacu Cõãmacũmena, teero biiri cũũ macũ Jesucristomena aññurõ niirõbirora múârê ùsãmena aññurõ niirĩ boogá. Teero tiirá, ùsã ññariguere, ùsã tuoriguere múârê wedea.

4 Ateré múârê jóacũã, marĩ niipetira usenirere buaáda jĩĩrã.

Cõãmacũ sãwócore tiiróbiro niigú

5 Jesucristo ùsãrê wederiguere múârê wedenetõneã. Cũũ biiro jĩĩwĩ: “Cõãmacũ aññugú, sãwócore tiiróbiro niigú niĩ. Cũũpũre ññaré, naĩtĩãre maniã”, jĩĩwĩ.

6 Sĩcũ “yũũja Cõãmacũmena aññurõ nijãã” jĩĩboqui. Cũũ teero jĩĩpacu sũcã, ññarére tiirucúqui; dia-macú maquêrê netõncãqui. Teero tiigú, jĩĩdito, naĩtĩãrõpũ niigú tiiróbiro niiqui.

7 Ññurere tiirucúgũnopeja Cõamacũ niirõbiro sãwócoropũ niigú tiiróbiro niĩ. Ñpẽrãména ññurõ niiqui. Teero biiri Cõamacũ macũ Jesucristoye díicã niipetire cũũ ññaré tiirere cosecú.

8 “Yũja ññarere tiiría” jĩgũno cũũ basiro jĩditogũ tiiqui; cũũ wãcũré diamacú niiricu.

9 Cõamacũ diamacú tiirucúgũ niiqui; cũũ jĩrirobirora tiigú niiqui. Teero tiigú, sícũ cũũ ññaré tiiriguere wedenetõrĩ, Cõamacũ acabógũdaqui. Niipetire cũũ ññaré tiirigue wapare ññarõ tũgueñanemorĩ tiiriqui.

10 “Yũja ññarere tiiría” jĩgũno Cõamacũ jĩriguere jĩditorigue tiiróbiro wáari tiiqui;* cũũ wedeserere tũodũgáhegũ tiiróbiro niiqui.

2

Cristo cũũ Pacũre marĩre wedesebosaqui

1 Múã yũ põnabiro niirãre teeré jóaa, ññarere tiirijãrõ jĩgũ. Jesucristo diamacú tiirucúgũ niiqui. Teero tiigú niijĩgũ, marĩ ññaré tiirí, cũũ Pacũre marĩre wedesebosaqui.

2 Cũũ diariguemena marĩ ññaré tiirere acabóre buamasĩã. Marĩ ññaré tiiré díicũre diabosarigũ niiwĩ; niipetira atibũreco macãrã ññaré tiirécãrẽ diabosarigũ niiwĩ.

3 Marĩ Cõamacũ dutirere tiirá, “diamacúrã Cõamacũrẽ masĩtoaa” jĩmasĩã.

4 Sícũ cũũ dutirere tiirípacũ, “yũ cũũrẽ masĩtoaa” jĩboqui. Teero jĩgũ jĩditorepigũ niiqui; cũũ wãcũré diamacú niiricu.

* **1:10** Proverbios 20.9.

5 Cõamacũ dutirére tiirucúgũno Cõamacũ booróbirora cũãrẽ maĩmasĩqui. Teeména “diamacúrã Cõamacũmena nijãã” jĩĩmasĩqui.

6 “Yũũ cũũmena nijãã” jĩĩgũno Jesucristo ti-irécutirirobirora tiinũnúsearo.

Cãmerĩ maĩñá

7 Yũũ maĩrã, yũũ múãrẽ jóare apeyé mama dutiré mee niiã; bũcu dutiré múã sicatorũ cũoríguera niiã. Múã tee bũcu dutirére tũotóajĩyu.

8 Teero niipacari, yũũ múãrẽ jóare mama dutiré tiiróbiro wáaa. Yũũ jóare diamacú maquẽ niiã. Jesucristo basirora teeré ãñowĩ; múãcã teeré ãñorã tiia. Múã ñañarére tiijĩrã, naĩtĩãrõpũ niirira tiiróbiro niimiwã. Ññurépere tiijĩrã, bóeropũ niirã wáara tiia sáa.

9 Sĩcũ biiro jĩĩboqui: “Yũũ bóeropũ niigú tiiróbiro niiã”. Teero jĩĩpacũ, Jesuré padeoráre ññatutiqui. Teero tiigú, naĩtĩãrõpũ niigú tiiróbiro nijãqui ména.

10 Jesuré padeoráre maĩgũnopeja bóeropũ niigú tiiróbiro niiqui. Tee bóeremena ñañarére ññasũguemasĩjĩgũ, “tee ñañarére tiiría” jĩĩqui.

11 Jesuré padeoráre ññatutigũno naĩtĩãrõpũ niigú tiiróbiro niirecutiqui. Teero biiri naĩtĩãrõpũ niigú tiiróbiro tiirecutiqui. Cũũ ñañarére tiiré wapa capeari baunóhẽgũ tiiróbiro niiqui. Teero tiigú, ãñurépere besemasĩriqui.

12 Múã yũũ põnabiro niirãrẽ jóagu tiia. Cõamacũ Jesucristo diabolosarigue wapa múã ñañarére tiirére acabótoajĩyi.

13 Múã bũtoáre jóagu tiia. Cristo sicatorũ niirigũre múã ãñurõ masĩcu.

Múã mamarãrẽ jóagũ tiia. Satanárẽ múã netõñcãrira niĩwũ.

14 Múã yũũ põnabiro niirãrẽ jóaawũ. Marĩ Pacure múã masĩtoacu.

Múã bũtoáre jóaawũ. Sicatorũ niirigure múã masĩtoacu.

Múã mamarãrẽ jóaawũ. Múã padeotutúa ni-icu; Cõãmacũ wedeserere múã wãcũrucucu; wãtĩãrẽ dutigũre múã netõñcãrira niĩwũ.

15 Atibúreco macãrã ñañaré tiirucúrenorẽ, teero biiri atibúrecoũ niirere maĩrĩjãña. Sĩcũ atibúreco macãrã tiiróbiro tiigũno Cõãmacũpere maĩríqui.

16 Atibúreco macãrã tiiré biiro niĩã: Noo booró tiidũgãre, bayiró ugaripéare, “ãpẽrã nemorõ niigũ niĩã yũũja” jĩrẽ niĩã. Tee Cõãmacũye mee niĩã. Tee niipetire atibúreco macãrã tiirẽpe niĩã.

17 Atibúreco, atibúreco macãrã ñañaré tiidũgãre petijõããdacu. Cõãmacũ boorere tiigũnopeja niiru-cujãgũdaqui.

Jesuyé queti jĩditore mee niĩã

18 Múã yũũ põnabiro niirã, niiture bũrecori jeatoacu. Atibúreco petiádari suguero, sĩcũ Cristore ññatutinetõjõãgũ atigũdaqui. Múã teeré tũotóarira niĩwũ. Atitóre paũ Cristore ññatutira jeatoawa. Teero tiirã, “niiture bũrecori jeatoaa” jĩĩmasĩã.

19 Cristore ññatutira marĩ menamacãrãrã ni-imirira niipacara, marĩrẽ cõãjãwã. Cũã marĩ menamacãrã peti mee niĩwã. Marĩ menamacãrã peti niirãjã, marĩmenarã niibocua ména. “Marĩrẽ cõãjãwã” jĩĩrã, ateré masĩã: Cũã niipetira marĩ menamacãrã mee niĩwã.

20 Cristo múãrẽ Espíritu Santore ticorigu ni-
iwĩ. Teero tiirá, múã niipetira diamacú maquẽrẽ
masĩtoacu.

21 Múã diamacú maquẽrẽ masĩriatã, múãrẽ
jóaribocu. Múã Jesucristoyere diamacú masĩcu.
Teero tiigú, múãrẽ jóaa. Múã ateré masĩtoacu:
Cũyue queti jĩditore mee niã.

22 Jĩditorepira biiro jĩcua: “Cõãmacũ beserigu
Jesús mee niĩ”, jĩcua. Teero jĩrã Cristore ñnatutira
niĩya. Cúã marĩ Pacu Cõãmacũrẽ, cũũ macũ Jesu-
cristomenarã sũnacúa.

23 Cũũ macũrẽ sũnarãno marĩ Pacumena niir-
icua. “Jesús Cõãmacũ macũ niĩ” jĩrãnopeja marĩ
Pacumena niicua.

24 Teero tiirá, múã sicato tũoríguere
wãcũrucujãña. Múã sicatoru tũoríguere wãcũrucura,
Cõãmacũ macũmena niirucujããdacu; cũũ
Pacumenacãrẽ niirucujããdacu.

25 Cũũ marĩrẽ jĩrirobirora tiigúdaqui: Marĩrẽ
catiré petihére ticogudaqui.

26 Múãrẽ jĩditodugaraye quetire jóaa, múãrẽ
ãñurõ masĩãrõ jĩgũ.

27 Espíritu Santo Jesucristo ticorigu múãpũre ni-
iqui. Teero tiirá, ãpĩ múãrẽ “nemorõ bueguda”
jĩgãrẽ boorijãña. Espíritu Santo múãrẽ niipetirere
buequi. Cũũ jĩditore manirõ diamacú maquẽrẽ
buequi. Cũũ bueróbirora Jesucristomena niijãña.

28 Mecũtígãcãrẽ múã yũũ põnabiro niirã, cũũmena
niirucujãña. Marĩ teero tiirá, cũũ putũaatiri,
boboricu. “Marĩ Cõãmacũ boorere tiirá niã”,
jĩmasĩãdacu.

29 Múã cǎũ diamacú tiirucúrere masĩtoaa. Teero tiirá, “niipetira diamacú tiiráno Cõãmacũ põnarã niĩya” jĩrere masĩnoã.

3

Cõãmacũ põna tiirécutive

1 Cõãmacũ marĩ Pacũ marĩrẽ bayiró maĩrére wãcũñate múã. Marĩrẽ bayiró maĩgú, “yũũ põna niĩya” jĩiqui. Teerora niĩã marĩ. Atibúreco macãrã Cõãmacũrẽ masĩrijĩrã, marĩ cǎũrẽ padeorá tiirécutive rere tuomasĩricua.

2 Yũũ maĩrã, mecũtigã marĩ Cõãmacũ põna niĩã. Too síropũ marĩrẽ wáadarere ãñurõ masĩña maniã ména. Ate dícare masĩã: Jesucristo pũtũaatiri, cǎũ baurere ãñaãdacu. Cǎũrẽ ãñaĩrã, cǎũ tiiróbiro wáaadacu.

3 Cǎũrẽ ãñaaré maniã. Marĩcã cǎũ tiiróbiro “ãñurã wáaadacu” jĩrere wãcũã. Teero tiirá, ãñaarere tiirĩjãrõ booa.

4 Ñañaaré tiiré Cõãmacũ dutirere netõncãre niĩã. Teero tiigú, ãñaarere tiirucúgnõ Cõãmacũ dutirere netõncãgũ niiqui.

5 Múã masĩtoaa: Jesucristo marĩ ãñaaré tiirere cõãgũ atirigu niĩwĩ. Cũũpũre péerogã ãñaaré maniã.

6 Cũũmena niigũno ãñaaré tiirécutive riqui. Ñañaarere tiirécutive rinope Cristore padeoriqui; cǎũrẽna masĩhẽgũ niiqui.

7 Múã yũũ põnabiro niirã, múãrẽ ãpĩ jĩĩditorijãrõ. ãñurõ tiirucúgnõ Jesús tiiróbiro ãñurõ tiigú niĩ.

8 Sicatopũra wãtĩãrẽ dutigú ãñaaré tiimũãatirigu niiqui. Teero tiigú, ãñaaré tiirécutive rino cǎũyagu

niiqui. Cõãmacũ macũ wãtĩãrẽ dutigú tiirére cõãgũ atirĩgu niĩwĩ.

⁹ Cõãmacũ cũũ põnarẽ cũũ tiiróbiro niirecutiri tiirĩgu niĩwĩ. Teero tiirá, Cõãmacũ põna ñañarére tiirucúricua.

¹⁰ “¿Noãpé niĩ Cõãmacũ põna?” teero biiri “¿noãpé niĩ wãtĩãrẽ dutigú põna?” jĩĩ masĩdugara, ateré masĩña: “Ñañaré tiirécutira, ãpẽrãrẽ maĩhẽrãno Cõãmacũ põna mee niĩya”, jĩĩnocu.

Cãmerĩ maĩré

¹¹ “Cãmerĩ maĩrõ booa” jĩĩré queti múã sicutopũ tũorĩgue niĩã.

¹² Caín tiiróbiro niirijããda. Cũũ wãtĩãrẽ dutigú menamacũ niijĩgũ, cũũ bai Abel wãmecutĩgure sããjãyĩgu. ¿Deero tiigú cũũrẽ sããyĩri? Caín tiirécutire ñañaré niyiro; cũũ bai tiirécutirepe ãñurẽ niyiro.

¹³ Yáa wedera, teeré wãcũrã, atibúreco macãrã múãrẽ ññatutiri ññarã, “¿deero tiirá yũre ññatutii?” jĩĩ wãcũrijãña.

¹⁴ Marĩ Jesuré padeoráre maĩjĩrã, ateré masĩã: Cõãmacũ marĩ pecamepũ wáaborirare catiré petihére cũorĩ tiirĩgu niĩwĩ. Jesuré padeoráre maĩhẽgũno catiré petihére cũorĩqui.

¹⁵ Jesuré padeoráre ññatutigũno basocáre sããgũ tiiróbiro niiqui. Múã masĩtoaa: Basocáre sããgũno catiré petihére cũorĩqui.

¹⁶ Ateména cãmerĩ maĩrére masĩã: Jesús marĩrẽ diabolarĩgu niĩwĩ. Teero tiirá, marĩcã Jesuré padeoráre “diabolagũda” jĩĩ wãcũrõ booa.

¹⁷ Pee apeyé cũogũno sĩcũ Jesuré padeogúre bóaneõgũ niirĩ ññapacũ, cũũrẽ tiiapuridojãboqui.

Cũu teero tiirípacu, ¿deero tiigú “Cõãmacũrẽ maĩã” jĩĩbogari?

¹⁸ Mũã yuu põnabiro niirã, marĩ wedeseremena dícu “cũãrẽ maĩã” jĩĩrijārõ booa. Marĩ tiiápurenape cũãrẽ maĩrere diamacũrã tiiẽñorõ booa.

Cõãmacũrẽ padeorá cuiro manirõ niimasĩã

¹⁹⁻²⁰ Apetó sícũ marĩ menamacũ biiro wãcũqui: “Yuu ñañanetõjõãgũ niiga” jĩĩ wãcũpacu, cũũ ãpẽrãrẽ maĩré wapa Cõãmacũmenape cuiro manirõ ni-iqui. Marĩ cũũ põna niiã. Cũũ marĩye maquẽrẽ masĩpetijãqui. Cũũ marĩ ñañaré tiiríguere acabóqui.

²¹⁻²² Marĩ yeeripũnapu “ãpẽrãména ãñurõ niiã” jĩĩ tugueñarã, cuiro manirõ Cõãmacũrẽ sãĩmasĩã. Cũũ dutirere, cũũ boorere tiirí, Cõãmacũ niipetire marĩ sãĩrere ticogũdaqui.

²³ Cũũ dutiré ate niiã: Cũũ macũ Jesucristore padeoáda. Teero biiri cũũ dutirobirora cãmerĩ maĩãda.

²⁴ Niipetira cũũ dutirere tiiráno cũũmena niicua; cũũcã cũãmena niiqui. Marĩrẽ Espíritu Santore ticorigu niiwĩ. Teero tiirá, Cõãmacũ marĩmena ni-irere masĩã.

4

Cõãmacũye wederáre ññabesedutire

¹ Yáa wedera, niipetira Cõãmacũyere wederí basoca wederere padeorijãña. Cũã wederere “¿diamacũrã Cõãmacũye niimiĩto?” jĩĩ tũosugúeya. Pau basocá “ũsã Cõãmacũyere wederá niiã” jĩĩdito buecãmesãya.

² Ateména diamacú Cõãmacũyere wederáre ññabesemasĩãdacu: “Jesucristo basocára atiyigũ” jĩgũno diamacúrã Cõãmacũyere wedequi.

³ Teeré wedehegũno diamacú Cõãmacũyere wederiqui. Cũũrã Cristore ññatutinetõjõãgũyere wedequi. Múã Cristore ññatutinetõjõãgũ atiadarere tũotóajĩyu. Cũũ basocá watoapũ niitoaqui.

⁴ Múã yũ põnabiro niirã, múã Cõãmacũ põnarã niiã. Cõãmacũ múãrẽ tutuarere ticoqui. Atibúreco macãrẽ tutuare ticogúpeja Cõãmacũbiro tutu-
ariqui. Teero tiirã, atibúreco macãrã múãrẽ cúã jĩĩditorere padeorĩ tiimasĩricua.

⁵ Jĩĩditemena buerápe atibúreco macãrã niĩya. Teero tiirã, atibúreco maquẽ dícre bueeya. Atibúreco macãrã cúã buerére tũonũnúsecua.

⁶ Marĩpeja Cõãmacũ põnarã niiã. Cõãmacũrẽ masĩgũno marĩrẽ tũonũnúsequi. Cõãmacũrẽ masĩhẽgũnopeja marĩrẽ tũonũnúseriqui. Marĩ teeré tũomasĩrã, “diamacúrã Cõãmacũye niiã” o “jĩĩditorsẽ niiã” jĩĩ besemasĩãdacu.

Cõãmacũ basocáre maĩquí

⁷⁻⁸ Yũ maĩrã, Cõãmacũ basocáre maĩquí. Teero tiirã, marĩcã cãmerĩ maĩãda. Cãmerĩ maĩrãno Cõãmacũ põnarã niicua. Cúã Cõãmacũrẽ masĩcua. Cãmerĩ maĩhẽrãnopeja Cõãmacũrẽ masĩricua.

⁹ Cõãmacũ marĩrẽ maĩrere ateména eñorĩgũ niiwĩ: Cõãmacũ cúũ macũ sĩcũ niigũrẽ atibúrecopũre tico-
diocorigũ niiwĩ. Marĩrẽ catiré petihére cũoáro jĩĩgũ, cúũrẽ diabosadutirigũ niiwĩ.

¹⁰ Marĩ Cõãmacũrẽ maĩrĩrira niiwũ. Cũũpe marĩrẽ maĩgũ, marĩ ññañaré tiirere acabódũgarigũ niiwĩ.

Teero tiigú, cūū macūrē ticodiocorigu niwī, diabosaaro jīīgū. Cūū marīrē biiro tiibosárigue maīré peti niicu.

11 Yuu maīrā, Cōāmacū teero tiirígu nijīgū, marīrē bayiró maīquí. Teero tiirá, marīcārē cāmerī maīrō booa.

12 Sīcū basocú Cōāmacūrē ĩñarigu maniquí. Marī cāmerī maīrī, cūū marīmena niiqui; cūū booróbirora cūūrē maīmasīā.

13 Cōāmacū marīrē Espíritu Santore ticorigu niwī. Teero tiirá, Cōāmacū marīmena niirére masīā; teero biiri marī cūūmenarā niirécārē masīā.

14 Ūsā basirora Cōāmacū macūrē ĩñawū. Ateré wedea: Cōāmacū cūūrē atibáreco macārā ñañarārē netōnédutigu ticodiocorigu niwī.

15 “Jesús Cōāmacū macū niī” jīīgúnorē Cōāmacū cūūmena niiqui; cūūcā Cōāmacūmenarā niiqui.

16 Cōāmacū marīrē maīrére masīā. “Cūū marīrē maīré diamacú maquē niīā” jīirére padeóa. Cōāmacū basocáre maīquí. Cāmerī maīrucúgano Cōāmacūmena niiqui; Cōāmacūcā cūūmena niiqui.

17 Marī Cōāmacū booróbirora cūūrē maīmasīā. Jesucristo atibárecopu niigū, cūū Pacure maīwī. Cūū maīrírobirora marīcā Cōāmacūrē maīmasīā. Teero tiirá, Cōāmacū basocáre wapa tiíadari bureco jeari, cūūrē cuiricu.

18 Cōāmacūrē maīgúno cūūrē cuiriqui. Cōāmacū booróbirora cūūrē maīgú, cuiru manirō niiqui. Cuire cūogúno “yūure ñañarō tiibóqui” jīī wācūqui; Cōāmacū booróbirora cūūrē maīríqui.

19 Cōāmacū marīrē maīsuguérigu niwī. Teero tiirá, marī cāmerī maīā.

20 Sīcū “Cōāmacūrē maīā” jīīpacu, Jesuré padeoráre ĩñatutigu, jīīditorepigū niiqui. Basocá

cũũ ññarãcãrẽ maĩhẽgũ, nemorõ Cõãmacũ bauhẽgũperea maĩmasĩriqui.

²¹ Cõãmacũrẽ maĩgũno Jesuré padeorãcãrẽ maĩrõ booa. Teeré Cõãmacũ marĩrẽ tiidutĩrigu niiwĩ.

5

Atibúreco maquẽ ññarére cãmotãmasĩre

¹ “Jesús Cõãmacũ beserigu Cristo niiĩ” jĩĩ padeorãno Cõãmacũ põnarã niicua. ãpẽrãrẽ maĩrãno cũã põnacãrẽ maĩcúa.

² Marĩ Cõãmacũrẽ maĩ, cũũ dutirere tiirã, “cũũ põnacãrẽ maĩã” jĩĩmasĩãdacu.

³ Cõãmacũrẽ maĩrãno cũũ dutirere tiĩya. Cũũ dutirẽ wisiória.

⁴ Marĩ Cõãmacũ põna atibúreco maquẽ ññarere tiirã. Jesucristore padeorẽmena ãñurere tiinõã.

⁵ Marĩ Jesuré “cũũ Cõãmacũ macũ niiĩ” jĩĩ padeóa. Teemẽna dícu atibúreco maquẽ ññarere cãmotãmasĩcu.

Jesucristo Cõãmacũ macũ niiĩ

⁶ Jesucristo Cõãmacũ macũ niiĩ. Cũũ atibúrecopũ niirĩ, Juan cũũrẽ wãmeõtiwi. Cũũrẽ wãmeõtigũ, ocomẽna wãmeõtiwi. Too síro cũũ curusapũ diajõãwĩ. Biiro tiirẽmena “yũũ Cõãmacũ macũ niiã” jĩĩrere ãñowĩ. Cũũrẽ wãmeõtiriguemena dícu ãñorĩwi. Cũũ diariguemenacãrẽ ãñowĩ. Espiritu Santo “Jesucristo Cõãmacũ macũ niiĩ” jĩĩrere marĩrẽ ãñoquí. Cũũrã diamacũ maquẽrẽ wedegũ niiĩ.

⁷ Atequetirẽ cũã basirora ãñoõya. Cũã ñĩãrã ãmũãsepũ niiĩya: Pacũ, macũ, teero biiri Espiritu Santo. Cũã ñĩãrãpũ niipacara, sĩcũrã niiĩ.

8 Atibárecopure Espíritu Santo wederémena “Jesús Cõamacũ macũ niĩĩ” jĩĩrére masĩnoã. Teero biiri Jesús cũũ Cõamacũ macũ niirére cũũ wãmeõtinoriguemena, cũũ diariguemena eñorigu niĩwĩ.

9 Basocá cũã ñnariguere wedericãrẽ, marĩ padeóa. Cõamacũ basocá wederé nemorõ diamacũ wedei. Cũũrã cũũ macũ niirecutirere wederigu niĩwĩ.

10 Cõamacũ macũrẽ padeogúno Cõamacũ wederére padeoquí. Cõamacũ wederére padeohéguno cũũ jĩiriguere jĩĩditorigue tiiróbiro wáari tiiquí; cũũ Cõamacũ cũũ macũ niirecutirere wederére padeoríqui.

11 Cõamacũ ateré wedequi: Cũũ marĩrẽ catiré petihére ticorigu niĩwĩ. Tee catiré petihére cũũ macũpure niicu.

12 Cõamacũ macũmena niigúno catiré petihére cwoquí; cũũ macũmena niihéguno catiré petihére cworíqui.

Wedeyaponorigue

13 Múã Cõamacũ macũrẽ padeoráre atipũrẽ jóaa, múã “catiré petihére cwoa” jĩĩ masĩarõ jĩĩgũ.

14 Marĩ masĩtoaa: Cõamacũ booróno sãĩrĩ, marĩ sãĩrére t̃woquí. Teeré masĩrã, cũũrẽ cuiro manirõ sãĩmasĩã.

15 “Cõamacũ marĩ sãĩrére t̃woquí” jĩĩmasĩrõbirora “cũũ marĩ sãĩariguercãrẽ ticotoai” jĩĩmasĩnoã.

16 Apetó tiigú, Jesuré padeogúno ñañaré tiirí, s̃icũno ññaboquí. Cũũ ñañaré tiiré acabómasĩreno niirĩ, Cõamacũrẽ sãĩbosáaro. Sãĩbosári, tee ñañaré tiiré acabómasĩreno niirĩ, Cõamacũ cũũrẽ catiré petihére ticogũdaquí. Apeyé ñañarõ tiiré

acabónoña maniré niicu. Teeré “sãĩbosáya” jĩĩña maniã.

¹⁷ Niipetire ñañaré tiiré Cõãmacũrẽ netõnucãre niipacari, apeyé ñañaré tiiré acabómasĩreno niicu.

¹⁸ Marĩ ateré masĩtoaa: Cõãmacũ põna ñañaré tiirécãtiricua. Jesús cúãrẽ cotequi. Teero tiigú, wãtĩãrẽ dutigú cúã padeorére ñañomasĩriqui.

¹⁹ “Marĩ Cõãmacũ põna niiã” jĩĩrere masĩã. Atecãrẽ masĩã: Wãtĩãrẽ dutigú niipetira atibúreco macãrãrẽ dutiqui.

²⁰ Apeyecãrẽ masĩã: Cõãmacũ macũ atirigũ ni-iwĩ; marĩrẽ tũomasĩrere ticorigũ ni-iwĩ. Teeména Cõãmacũ diamacú niigúrẽ masĩã. Cõãmacũmenarã niiã. Teero hiiri cũũ macũ Jesucristomenacãrẽ niiã. Jesucristo Cõãmacũ diamacú macũ niigú ni-iqui. Cũũrã niiqui sũcã catiré petihére ticogú.

²¹ Múã yũũ põnabiro niirã, “cõãpõnarẽ basocá weerirare padeobócu” jĩĩrã, Jesuré wãcũrucujãña. Nocõrõrã niiã.

Cõãmacũ mecũã wedesei New Testament in Tuyuca

copyright © 2011 Wycliffe Bible Translators, Inc.

Language: Tuyuca

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Tuyuca

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-08-06

PDF generated using Haiola and XeLaTeX on 18 Apr 2025 from source files
dated 29 Jan 2022
a71ca523-cda5-572a-9b0b-61d9ea37d1a8